

**Innuttaasut peqqissutsikkut sullinneqarsinnaanissaat anguniarlugu cubameersuni
peqqinnissaqarfimmi sulisunik sulilersitsiniaanissamut suliniut
unitsinneqarallarsimasoq aallarnisaqqinnissaa anguniarlugu Naalakkersuisut
peqquneqarnissaanik Inatsisartut aalajangiiffigisassaattut siunnersuut.**

Aallarnisaanissaq 2022 naatinnagu pissaq
(Inatsisartunut Ilaasortaq Anna Wangenheim, Demokraatit)

pillugu

Ilaqutariinnermut Peqqissutsimullu Ataatsimiititaliap

siunnersuutit aappassaaneerneqarnerannut

ISUMALIUTISSIISSUTAA

Ataatsimiititaliaq sularinninnermini uku ilaasortarai:

Inatsisartunut ilaasortaq Anna Wangenheim, Demokraatit, siulittaasuugallartoq

Inatsisartunut ilaasortaq Hans Peter Poulsen, Siumut

Inatsisartunut ilaasortaq Mikivisuk Thomassen, Inuit Ataqtigiit

Inatsisartunut ilaasortaq Eqaluk Høegh, Inuit Ataqtigiit

Inatsisartunut ilaasortaq Dines Mikaelson, Siumut

Inatsisartunut ilaasortaq Najaaraq Møller, Siumut, sinniisussaq

Inatsisartunut ilaasortaq Paneeraq Olsen, Naleraq, sinniisussaq

UKA 2022-imi oktoberip 27-iani siullermeerinerup kingorna siunnersuut ataatsimiititaliap misissorpaa

1. Siunnersuutip imarisaa siunertaalu

2022-i naatinnagu Cubameersuni peqqinnissaqarfimmi sulisunik sulilersitsiniaanissamut suliniut unitsinneqarallarsimasoq aallarnisaqqinnissaa anguniarlugu Naalakkersuisut peqquneqarnissaanik Inatsisartut aalajangiiffigisassaattut siunnersuuteqarnermigut siunnersuuteqartup anguniarpaa.

2. Siunnersuutip Inatsisartunit siullermeerneqarnera

Siunnersuummik matuminnga ataatsimiititaliamut innersuunneqartumik siullermeerinninnermi peqqinnissaqarfimmi sulisussaaleqineq annertuumik ajornartorsiutaasoq, ajornartorsiutaasorlu

Kalaallit Nunaanni kisimi atuutinngitsoq tamakkiisumik isumaqatigiissutigineqarpoq. Allanguutissatut siunnersuutinik marlunnik saqqummiussisoqarpoq:

Naalakkersuisut imaattumik allanguutissatut siunnersuummik saqqummiussaqaqput:

”Kalaallit Nunaanni Peqqinnissaqarfimmi nunanit allanit peqqinnissakkut sulisorisanik sulisussarsiortarsinnaanermut periarfissat aamma aporfii misissorneqarnissaat pillugit Naalakkersuisut peqquneqarnissaanik Inatsisartut aalajangiiffigisassaattut siunnersuut.”

Aamma Naleraq imaattumik allanguutissatut siunnersuummik saqqummiussaqaqput:

”Kalaallit Nunaanni Peqqinnissaqarfimmi nunanit allanit peqqinnissakkut sulisorisanik sulisussarsiortarsinnaanermut aporfiaanissaq, oqaatsit atorineqartut (journalsprog) tuluttut napparsimaveqarfimmiluunniit tulluarneq (fagsprog) pillugu Naalakkersuisut peqquneqarnissaanik Inatsisartut aalajangiiffigisassaattut siunnersuut”.

3. Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassat siunnersuutip piviusunngortinneqarnissaanut aningaasaqarnikkut allaffissornikkullu kingunerisassat siunnersuummi allaaserineqassasut. Siunnersuutip piviusunngortinneqarnerani aningaasatigut kingunerisassatut allanneqarsimasunut siunnersuutigineqartumut naapertuuttut, taamaalilluni aningaasartuutit 125.000 kr.-t qaangernaviangikkaat naatsorsuutigineqartoq ataatsimiititaliamit maluginiarneqarpoq.

4. Ataatsimiititaliap siunnersuutinik suliarinninnera

Peqqinnissaqarfik ilinniarsimasunik sulisoqarniarnermigut annertuumik ajornartorsiuteqartoq ataatsimiititaliamit isumaqatigineqarpoq. Tamanna aamma Aningaasaqarnermut Siunnersuisoqatigiit nalunaarusaanni erseqqissarneqarpoq, matumani siammasissumik nunassittarneq innuttaasullu utoqqaanerusaleriartornerat pissutaqaatasut aamma tikkuarneqarpoq¹.

Allanguutissatut siunnersuut Naalakkersuisut saqqummiussaasut periarfissanik misissuinissamik nunaniillu allaniit sulisunik peqqinnissamut tunngasunik ilinniarsimasunik atorfinitsitsiniarnermi aporfiusinnaasunik imaqartoq ataatsimiititaliamit maluginiarneqarpoq. Allanguutissatut siunnersuut ullormik piffissalerneqarsimanngilaq. Aningaasaqarnikkut allaffissornikkullu kingunerisassat eqqarsaatigalugit ersarinngitsumik allassimanngillat, soorluttaaq misissuineq misissuinernut ingerlanneqareersunut aallartisarneqartunullu ilanngunneqassanersut ersarissumik allaqqanngitsut.

¹ Kalaallit Nunaata aningaasaqarnera ukiaq 2022, Aningaasaqarnermut siunnersoqatigiit

Naleqqap allannguutissatut siunnersuutaanni nunani allaneersunik peqqinnissamut tunngasunik ilinniarsimasunik atorfinitsitsinissamut aporfusinnaasut piiarneqarnissaannut nalunaarsuiffimmi oqaatsit atorpeqartut allanngortinneqarnissaannik siunnersuutaqqaartumullu sinaakkusiussanik allaanerusumik Naalakkersuisut suliaqaqquneqarput. Taamaattumik Naleqqap allannguutissatut siunnersuutaa allannguisuunnginnissamik piumasaqaammut naapertuutinngitsoq ataatsimiititaliamit nalilerneqarpoq.

Sulisussanik nunanit allaneersunik atorfinitsitsiniarnermi periarfissat akimmiffiillu suli suussusersineqanngitsut suussusersineqarnissaat allannguutissatut siunnersuuteqarnermi ilaatigut siunertaasoq ataatsimiititaliap apeqqutaanut Naalakkersuisut akissutaanni allassimavoq. Sulisinnaatitaanermut tunngatillugu Naalakkersuisut allapput suliassaqaarfimmum maleruagassat qanganisaasut, taamaattumillu sulisussanik nunanit allaneersunik atorfinitsitsiniarnermi periarfissanik akimmiffinnillu misissueqqissaartoqassappat peqqissaasut sulisinnaatitaanerat sulinerallu pillugit Inatsisartut inatsisissaannik atuutilersitsinissamik pisariaqartitsineq inatsisilerinikkut nalilersorneqartariaqassasoq.

Peqqinnissaqaarfimmi oqaatsinut tunngatillugu Naalakkersuisut allakkatigut akissutiminni allapput kalaallit skandinaviamiullu oqaasiisa saniatigut allat oqaasii misilittagaqaarfigineqarpallaanngitsut. Aammalu oqaatsit allat atorlugit sulineq nalunaarsuinerlu ingerlanneqassappata oqaatsitigut aporfeqassasoq. Minnerunngitsumik sulisut peqqinnissaqaarfimmillu atuisut akornanni attaveqatigiinnermi oqaatsit eqqarsaatigalugit. Suliassaqaarfik siumoortumik misissueqqissaarfigeqqaarnagu sulisunik Danmarkip avataaneersunik atorfinitsitsisoqassagaluarpata peqqinnissaqaarfimmi paaqqutarinninnerup pitsaassusaanut kingunerisassai Naalakkersuisunit suli oqaatigineqarsinnaanngillat.

5. Ataatsimiititaliap inassuteqaatai

- Ataatsimiititaliami amerlanerussuteqartut Inuit Ataqtigiinneersut, Siumumeersut aammalu Demokraatineersut allannguutissatut siunnersuummik saqqummiussippat aammalu akuerissutigineqarnissaa inassutigalugu:

”Kalaallit Nunaanni Peqqinnissaqaarfimmi nunanit allanit peqqinnissakkut sulisorisanik sulisussarsiorarsinnaanermut periarfissat aamma aporfii misissorneqarnissaat pillugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Taanna pillugu nalunaarussiaq UKA2023-mi agguanneqassaaq”.

- Ataatsimiititaliami ikinnerussuteqartup Naleqqameersup Naleqqap allannguutissatut siunnersuutaa akuerineqarnissaa inassutigaa

Taamatut oqaaseqarluni isumaliutissiissummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.



Hans Peter Poulsen



Dines Mikaelen



Najaaraq Møller




Anna Wangenheim
Siulittaasuugallartog



Mikivuk Thomassen



Eqaluk Høegh



Paneeraq Olsen



Ilaqutariinnermut Peqqissutsimullu Ataatsimiititaliaq
mika@ina.alla.g, inatsisartut@inatsisartut.gll

**Imm. UKA2022/81 sulisunik nunanit allaneersunik atorfinitsitsiniarneq pillugu
allakkatigut apeqqummut akissuteqaat**

Ilaqutariinnermut Peqqissutsimullu Ataatsimiititaliaq apeqquteqarmat qutsavigaara,
taakkulu ataani issuarneqarlutillu akineqassapput.

1. Sulisussanik nunanit allaneersunik atorfinitsitsiniarnermut atatillugu
sulisussarsiortarneq siuliani taaneqartut saniatigut sunik
unammillernartoqartutut Naalakkersuisunit isumaqarfigineqarpa?

Akissut:

Naak Naalakkersuisut akimmiffinnik arlalinnik ilisimasaqaraluarlutik, Naalakkersuisut
naatsorsuutigaaataaq sulisunik nunanit allaneersunik Peqqinnissaqarfimmi
atorfinitsitsiniarneq pillugu suliniut sulii erseqqissarneqarneruppat akimmiffinnik maanna
ilisimaneqanngitsunik suussusersisoqarsinnaanissaa.

2. Peqqissutsikkut sullissisunik ilinniarsimasunik sulisussarsiortnermi inuiaat sorliit
aallartiffigisinnaanerigivut Naalakkersuisut isumaqarpat?

Akissut:

Naalakkersuisut inuiannik aalajangersimasunik salliutitaqanngillat, aamma
peqqissutsikkut sullissisut oqartussaasut susassaartut piumasaqaataannik eqqortitsisut
peqqinnissaqarfimmi sulinissaat tunngaviumik killilersorusunngilaat.

3. Akimmisaarutaasut ilisimaneqareersut piiarneqarnissaat siunertaralugu
Naalakkersuisut danskit ministereqarfiinut attaveqalersaarpat?

Akissut:

Qallunaat oqartussaasuinut saaffiginnittoqassappat nunanit allaneersunik
atorfinitsitsinissamik pilersaarutit ersarinnerusariaqarput, tamatumalu saniatigut
akimmiffiit peerusutat pillugit ikioqqusoqassappat akimmiffiit tamakkiisumik
ilisimasaqarfigineqartariaqarput.

4. Akuersissuteqartarnermut inatsimmut ajornartorsiutaasoq pillugu
Naalakkersuisut qanoq suliaqarpat suliaqarfirmilu killiffik qanoq
isikkoqarpa?

Akissut:

Ilaqutariinnermut Peqqissutsimullu Ataatsimiititaliap "akuersissuteqartarnermut
inatsimmi" ajornartorsiutaasoq pillugu apeqqutimini inatsit suna innersuussutigineraa

15-11-2022
Suliat nr. 2022 - 23446
Allagaatit nr. 21758665

Postboks 1160
Oqarasuaat: 34 50 00
Fax: 34 55 05
3900 Nuuk
Email: pn@nanoq.gl
www.naalakkersuisut.gl

Nakorsat pillugit § 3 a, imm. 2 naapertorlugu Peqqissutsmut Aqutsisoqarfik/Nunatsinni Nakorsaaneqarfik nakorsat Danmarkip avataani ilinniarsimasut nunatsinni nakorsatut sulinissaannut akuersissutinik tunniussisinnaatitaavoq. Taamaattumik nalilerneqarpoq nakorsat nunatsinni namminersorlutik sulinissaannut akuersissummik tunineqarsinnaasut.

Nakorsanilli, Danmarkimit akuersissummik tunineqarsimangitsunik, nunanit allaneersunik atorfinitsinersermi qinnuteqartoq nunatsinni nakorsatut sulinissamut piunasaqaatinik eqqortitsinersoq nalilersorumallugu nunami pisariaqartunik malittarisassaqaqartariaqassallunilu isumalluuteqartariaqassaaq. Tamatuma saniatigut nakorsaq pineqartoq nunatsinni sulilerpat suliaqarnikkut oqaatsitigullu tapersorsorneqarsinnaasut isumalluuteqartariaqarsinnaavoq.

5. Nunatta Danmarkillu avataaniit peqqinnissaqarfimmut suliarortunik sulisussatigut pissarsissagutta oqaatsit aporfiumissaat naatsorsuutaanerluni?

Akissut:

Peqqinnissaqarfik skandinaviamiut kalaallilu oqaasiisa saniatigut oqaatsit allat atorlugit sulineramik misilittagaqarpallaanngilaq, taamaattumik ass. tuluit oqaasii sulinerami nalunaarsuisarnermilu atorneqalissappata oqaatsitigut aporfeqarnissaa naatsorsuutigineqarpoq. Tamatuma saniatigut naatsorsuutigineqarsinnaavoq nakorsiarfitsisarnerit assigisaallu tuluttut ingerlanneqalissappata Peqqinnissaqarfimmi atuisut sulisullu akornganni oqaatsitigut suli annerusumik aporfeqarsinnaanissaa. Tuluit oqaasii sulinerami nalunaarsuisarnermilu atorneqalissappata naatsorsuutigineqassaaq Peqqinnissaqarfimmi oqalutsit pisariaqartinneqarnerat annerulissasoq. Oqalutsit tuluttut oqalussinnaasut pisariaqartinneqartut atorfinitsinneqarsinnaanersut maanna suli qulaajarneqanngilaq.

6. Peqqinnissaqarfimmi Danmarkip avataaniit sulisussanik pissarsiniarneq ammaanngassappat qulakkeerneqarsinnaanerluni peqqinnissaqarfimmut tunngatillugu piginnaasai pitsaasuunersut?

Akissut:

Pitsaassuseq eqqarsaatigalugu peqqissutsikkut sullissisut piginnaasaat pillugit piunasaqaataasut apeqqutaassapput. Taakku suli tamakkiisumik qulaajarneqanngillat, taamaattumik piunasaqaatinik qulaajaaneq peqqinnissaqarfimmi sulisunik nunanit allaneersunik atorfinitsitsisinnaanermut periarfissanik suliaqaqqinnermut ilaassaaq.

Ataatsimut isigalugu eqqaaneqarsinnaavoq peqqissutsikkut sullissisut akuersissuteqartarnerannut pisortatigoortumik piunasaqaatit Nunatsinni Nakorsaaneqarfimmi suliarineqartarmata. Piginnaasatigut piunasaqaatit allat Peqqinnissaqarfip ataaniipput, tamatumani lu peqqissutsikkut sullissisut atorfinitsinneqartarput.

Inussiarnersumik inuulluaqqusillunga



Mimi Karlsen

ersarluppoq. Nunatsinni peqqissutsikkut sullissisut pillugit akuersissuteqartarneq ataani allassimasunit pingaarnertut malittarisassiorneqarpoq¹:

- Peqqissaasut sulisinnaatitaanerit sulinerallu pillugit Inatsisartut peqqussutissaannut nr. 7, 30. oktober 1995-imeersussamut
- Peqqissaasut nunani allaneersut peqqinnissaqarfimmi atorfinitsitaasarnerat pillugu Namminersornerullutik Oqartussat nalunaarutaat nr. 15, 22. april 1998-imeersoq
- Nakorsatut sulineq pillugu inatsisip Kalaallit Nunaanni atortuulersinnissaa pillugu peqqussut normu 860 18. december 1991-meersoq
- Lov nr. 276 af 26. maj 1976 om tandlæger
- Lov nr. 671 af 13. december 1978 om jordemødre
- Lov nr. 142 af 26. april 1972 om fodterapeuter
- Lov nr. 100 af 14. marts 1979 om kliniske tandteknikere
- Lov nr. 154 af 8. maj 1968 om terapiassistenter (ergoterapeuter og fysioterapeuter)

Ataatsimut isigalugu oqaatigineqarsinnaavoq susassaqarfik pillugu malittarisassiuussineq qangarnisaasoq, taamaattumik sulisunik nunanit allaneersunik atorfinitsitsinnaanermut periarfissanik misissueqqissaarneq peqqissutsikkut sullissisut peqqissutsikkullu sullissineq pillugu akuersissuteqartarnermut tunngatillugu Inatsisartut inatsisiliornissamik pisariaqartitsinerup inatsisilerituunit nalilersorneqarnissaa pissusissamisuussaaq.

Ullumikkut Peqqinnissaqarfimmi sulisunik nunanit allaneersunik atorfinitsitsisarnermut tunngatillugu nalilerneqarpoq peqqissaasut nakorsallu nunanit allaneersut akuersissuteqartarnerat pillugu malittarisassat ataaniittut erseqqissarneqarnissaat.

Peqqissaasut akuersissuteqartarnerat

Peqqissaasut maani nunatsinni sulerusuttut akuersissuteqartariaqarput. Nunatsinni Nakorsaaneqarfiup peqqissaasut tamaasa akuerisarpai, takuuk Peqqissaasut sulisinnaatitaanerit sulinerallu pillugit Inatsisartut peqqussutaat nr. 7, 30. oktober 1995-imeersoq². Taamatuttaaq tamatumunnga taputartuutaasumik nalunaaruteqarpoq³ peqqissaasunik nunanit allaneersunik atorfinitsitsinissamut piumasaqaatinik nassuiaanerusumik.

Nakorsat akuersissuteqartarnerat

Nakorsat maani nunatsinni sulerusuttut akuersissuteqartariaqarput, takuuk Nakorsatut sulineq pillugu inatsit⁴. Inatsit naapertorlugu qallunaat Peqqissutsimut Aqutsisoqarfiat piginnaatitaavoq, peqqinnissaqarfilli tiguneqarmat pisinnaatitaaneq maanna Nunatsinni Nakorsaaneqarfimmiippoq.

¹ Peqqinnissaq pillugu inatsisiliorneq - Nunatsinni Nakorsaaneqarfik - NUN.gl

² Peqqissaasut sulisinnaatitaanerit sulinerallu pillugit Inatsisartut peqqussutissaannut nr. 7, 30. oktober 1995-imeersussamut

³ Peqqissaasut nunani allaneersut peqqinnissaqarfimmi atorfinitsitaasarnerat pillugu Namminersornerullutik Oqartussat nalunaarutaat nr. 15, 22. april 1998-imeersoq

⁴ Nakorsatut sulineq pillugu inatsisip Kalaallit Nunaanni atortuulersinnissaa pillugu peqqussut nr. 860, 18. decembari 1991